

Ministar unutrašnjih poslova Kantona Sarajevo Ismir Jusko rođen je 1971. godine u Saveznoj Republici Njemačkoj. Osnovnu i srednju školu završio je u Sarajevu, kao i Fakultet za sport i tjelesni odgoj Univerziteta u Sarajevu gdje je i magistrirao te pohađa doktorski studij (oblast ljudskih resursa).

Tokom 30-godišnje radne i sportske karijere, ostvario je zavidne rezultate i dobio eminentna domaća i međunarodna priznanja te stekao radno i menadžersko iskustvo.

U Ministarstvu za unutrašnje poslove BiH radio je od 1990. do 1996. godine, gdje je u Specijalnoj jedinici policije obavljao poslove i zadatke od policajca specijalca, komandira odjeljenja, komandira voda, zamjenika komandira čete, do pomoćnika komandanta Specijalne jedinice. U ovom periodu, također je bio instruktor taktike specijalnih dejstava, antiterorističke borbe, bliske zaštite VIP ličnosti, specijalne i opće fizičke pripreme pripadnika Specijalne jedinice MUP-a BiH.

Branilac je Grada Sarajeva i Bosne i Hercegovine od početka agresije na našu zemlju, a ministar unutrašnjih poslova BiH ga je u znak priznanja za hrabrost i ispoljen lični primjer odlikovao **Pištoljem s posvetom**.

Od decembra 1996. do marta 2007. godine, bio je uposlenik Ambasade SAD-a u Sarajevu gdje je radio u Regionalnom odjelu za sigurnost. U tom periodu, proveo je pet mjeseci na edukacijama u SAD-u u posebnim kampovima za antiterorizam gdje je uspješno završio obuku za instruktora za borbu protiv terorizma i rješavanje kriznih situacija.

Tokom rada u Ambasadi SAD-a u Sarajevu, za svoj rad dobio je devet priznanja od State Departmenta.

Kao instruktor, radio je s Ministarstvom sigurnosti BiH, Specijalnom jedinicom BiH-SIPA, Odjeljenjem za zaštitu VIP ličnosti i jedinicom za specijalnu podršku Direkcije za koordinaciju policijskih tijela BiH, Agencijom za školovanje i stručno usavršavanje kadrova te Specijalnom jedinicom Federalne uprave policije, Jedinicom za specijalističku podršku MUP-a Kantona Sarajevo i zatvorskom policijom.

Dužnost potpredsjednika uprave i direktora Poslovne jedinice Sarajevo kompanije Sector Security obavljao je od 2007. do 2010. godine, dajući veliki doprinos njenom unapređenju i razvoju kroz posebni angažman na uspostavljanju Akademije za edukaciju uposlenika, uvođenju ISO standarda te formiranju i uspostavi novih poslovnih jedinica u Kompaniji. Zbog zasluga za doprinos razvoju kompanije Sector Securitas, nagrađen je **Zlatnom poveljom i Zlatnom značkom** ove kompanije.

U organizaciji Ambasade Ujedinjenog Kraljevstva u Sarajevu, uspješno je završio 12-mjesečni kurs za obavljanje prezentacija, vođenje sastanaka i pregovora prema standardima EU i NATO. Zbog postignutih odličnih rezultata tokom ovog kursa, na poziv British Councila, pohađao je i završio još tri kursa za instruktore iz navedenih oblasti.

Od 2010. godine do januara 2013. godine i od septembra 2013. do novembra 2014. godine, radio je u Ministarstvu sigurnosti BiH – Agencija za policijsku podršku na dužnosti šefa

Kabineta direktora, a od januara do septembra 2013. godine bio je savjetnik ministra sigurnosti BiH.

Zastupnik u Skupštini Kantona Sarajevo bio je u periodu od 11.11.2014 do 24.11.2015. godine, nakon čega je imenovan na funkciju ministra unutrašnjih poslova Kantona Sarajevo koju je obnašao do maja 2016. godine. Nakon toga, imenovan je za ministra komunikacija i prometa BiH do 2018. godine kada je preuzeo funkciju ministra za boračka pitanja Kantona Sarajevo.

Imenovan je za ministra unutrašnjih poslova Kantona Sarajevo 03. marta 2020. godine.

Pored navedenog, 40 godina aktivno se bavi sportom. Nosilac je crnog pojasa 5. DAN u karateu i 4. DAN u Jiu-Jitsu. Kao alpinista, učesnik je šest međunarodnih ekspedicija s kojima je izlazio na vrhove od oko 7000 m nadmorske visine.

Dobitnik je **nagrade Isa-beg Ishaković** 2010. godine za doprinos razvoju sporta i fizičke kulture u BiH.

Za dosadašnji rad kao trenera i međunarodnog instruktora borilačkih vještina i za postignute rezultate u sportu, Evropski Budo savez ga nominuje za prestižno priznanje **HALL OF FAME** (Kuća slavnih) za 2012. godinu. Prvi je sportista iz porodice borilačkih vještina u BiH koji je dobio ovo veliko priznanje. U Lisabonu je 2013. godine dobio prestižno međunarodno priznanje **Master of the year** (majstor godine u oblasti borilačkih vještina).

Pored borilačkih vještina, aktivno se bavi alpinizmom i ronjenjem.

Govori engleski jezik.